

SPECIMEN INAUGURALE MEDICUM
DE
PESTE

BEHM

1792

12977/P

ALFRED H. WILSON, JR. 1917-1918

BY

17234

1918

1918



Digitized by the Internet Archive
in 2018 with funding from
Wellcome Library

<https://archive.org/details/b3036873x>

12977/P
50249
SPECIMEN INAUGURALE MEDICVM
DE

P E S T E

QVOD

RECTORE ACADEMIAE MAGNIFICENTISSIMO
SERENISSIMO PRINCIPE AC DOMINO
D O M I N O

C A R O L O A V G V S T O

DVCE SAXONIAE IVLIACI CLIVIAE MONTIVM ANGARIAE
ET GVESTPHALIAE LANDGRAVIO THVRINGIAE REL.

CONSENTIENTE GRATIOSO MEDICORVM ORDINE

P R O G R A D V D O C T O R I S

MEDICINAE ET CHIRVRGIAE

A. D. IV FEBRVARII CLIO CCLXXXII.

PLACIDO ERVDITORVM EXAMINI SVBMISIT

CAROLVS FRIDERICVS BEHM

HABSALIA - ESTHONVS

CHIRVRGVS IN EXERCITV RVSSICO PRIMARIVS.

IENAE,

TYPIS GOEPFERDTII.

DEED



SERENISSIMO PRINCIPI AC DOMINO

D O M I N O

MATTHIAE GAGARIN

SACRI RVSSICI IMPERII PRINCIPI

AVGVSTISSIMAE OMNIVM RVSSIARVM IMPERATRICIS
EXERCITVVM PRAEFECTO ET COHORTIS PRAETO-
RIANAE DVCI DYNASTAE PLVRIVM TERRARVM

BONARVM LITERARVM VINDICI AC PATRONO

DOMINO ET MAECENATI SVO

INDVLGENTISSIMO ET MVNIFICENTISSIMO

SPECIMEN HOC ACADEMICVM

TANQVAM

GRATISSIMAE MENTIS DOCUMENTVM

EA QVA DEBET

ANIMI RELIGIONE

D. D. D.

SERENISSIMI NOMINIS

DEVOTISSIMVS CLIENS

CAROLVS FRIDERICVS BEHM.

*Cum specimen hoc inaugurale ad purpuram
TVAM, SERENISSIME PRINCEPS, depono, non mo-
rem sequor frequenti abusu suspectum, sed ani-
mo indulgeo aeterna pietate TIBI devincto.
Summa sane laetitia arripui opportunitatem,
publice declarandi, quanta TVAE in me fuerint
gratiae ac benignitatis documenta, qualisque
mea sit erga TE grata mens et beneficiorum
TVORVM memor. Tot tantisque, quibus me
cumulasti, clementiae TVAE signis ac testimoniis
hoc,*

hoc, precor, adde, ut benigno vultu excipias
inimiculum, quod, etsi leuicense nec T_{VA} per-
sona dignum sit, pietatem tamen meam et in
T_E reuerentiam testatur. Deum ter Optimum
Maximum supplex obsecro, ut T_E T_{VA}que Se-
renissimam domum sospitem ac incolumem ser-
uet, T_{VA}que vitam ad hominum multorum sa-
lutem augendam et perficiendam in seros usque
annos perducatur.

PROOEMIUM.

Saepe diuque mecum reputavi, num hac mea commentatiuncula augerem illorum librorum numerum, qui de peste scripti sunt, praesertim cum tot et tam variae euulgatae sint observationes virorum, quibus morbum illum saepius contemplari licuit in regionibus eidem quam maxime obnoxiiis. Etsi vero nec eorum, qui non sine propriae vitae discrimine malum illud, humano generi infestissimum, adcuratius examinare studuerunt, laudi aliquid detrahere animus sit, nec meam experientiam illorum doctrinae et peritiae comparare; videtur tamen ipsa morbi atrocissimi varia indoles, aequae ac diversae curationis modus, tum nova aliqua et pristinis observationibus subiungenda additamenta admittere, tum iterata disquisitione et confirmatione quodammodo indigere.

Itaque cum et mihi anno MDCCCLXXXIII, dum Chersoni viuerem et Chirurghi in classe Russica primarii munere fungerer, pestem observandi opportunitas non defuerit, pluresque aegroti hoc morbo laborantes meae curae in nosocomio, cui praefectus eram, traditi fuerint; non plane inutilem laborem me suscepturum esse arbitrabar, si annotationes meas super hoc morbo factas in ordinem redigerem ex iisque specimen inaugurale componerem, quod, veluti symbola, aliorum virorum scriptis adderetur. In re, quae humano generi quam maxime interest, ne symbolam quidem, quantulacunque sit, plane despiciendam aut pro nihilo habendam esse equidem mihi persuadeo.

Monendum autem est, me non plane rudem ad investigationem naturae huius morbi accessisse: iam enim legeram
scripta



Scripta b. SCHREIBERI et Perill. Lib. Bar. ab ASCH, nec non praecepta illa medica, quae iussu Collegii sanitatis Mosquensis durante ibi peste typis exscripta sunt. Sed etiam si egregiis illis observationibus, et regulis innitendum esse censerem, ipsam tamen naturam consulere adeoque illa, quae didiceram, propria experientia confirmare studui. Silentio vero praeterire nequeo singularem erga me amicitiam cl. SCHINDLERI, Chirurgi in exercitu Russico primarii, qui sapienti consilio saepissime mihi succurrit, suaeque experientia, (viderat enim pestem iam priori bello turcico), quaecunque mihi ad intelligendam morbi naturam et curationis indolem ab initio deessent, beneuole suppeditauit.

Quod si vero in his et in illis a communi opinione recessisse videar; non nouitatis studio indulgi, sed experientiam ipsamque naturam ducem habui, cui maiorem fidem me adhibuisse, quam hominum auctoritati, lubens fateor. Quae autem scripsi, vera sunt nec aliorum testimoniis egent: si tamen opus est, ut in re tam graui aliena fides meae addatur, liceat citare testem omni exceptione longe maiorem, Collegium nempe Illustrissimum, quod res medicas per totum, qua late patet, Imperium Russicum sapientissime dirigit, cui non solum ea, quae retuli, nota sunt, sed cuius examini ipsa haec academica commentatio subiicienda demum est.

Denique vero, ne speciminis inauguralis limites transirem, varias pestis species earumque notas characteristics non recensui, sed meas qualescunque observationes et remedia, quibus in curando perniciosissimo hoc morbo usus sum, breuiter exposui. Animus enim potius fuit experientia mea qualicunque illustrare et confirmare id, quod quidem aliorum observatio docuit, nondum vero plane expediuit, quam ea repetere, quae absoluta sunt nec ulteriori examine aut expositione indigere videntur.

§. I.

Inter varios illos morbos, quibus humana natura obnoxia est, vix vllum inuenies, qui pesti comparari possit, tum quoad diuersitatem in decursu et curationis modo, tum respectu communis et inuincibilis fere pernicie, quam inferre solet. Semper oritur, certe in Europa, per communicationem aut infectionem. *) In aëre contagium vix esse potest: tum enim omnes hoc morbo adfici deberent, exceptis iis, quibus nulla dispositio ad illum intercederet. Ipsa vero pestis serius ocys sese manifestat per signa sua, et quidem diuerso modo, ratione maioris minorisue vis contagii, habitus aegroti, decursus morbi, naturae miasmatis et epidemicae constitutionis. Haec constitutio Chersoni duplex fuit, vel biliosa, vel putrida. Catarrhales morbi sporadice ibi occurrunt, mere inflammatorii raro.

§. II.

Plurimi illorum Virorum, fama meritisque conspicuorum, qui pestem suis oculis viderunt et adcurate obseruarunt, consentiunt

*) Varias Medicorum hac de re sententias docte strictimque exposita si legere vis, librum adeas, cui titulus est: *HOWARD'S Nachrichten von den vorzüglichsten Krankenhäusern und Pesthäusern in Europa*. Leipz, 1791. pag. 81 — 85. pag. 109 — 112.



tiunt quidem plerumque in descriptione originis et symptomatum huius morbi, non vero in distinctione graduum et curationis ipsius. Vt exempla tantummodo proferam illorum scriptorum, qui pestem in eadem regione obseruarunt, in qua ipse illam vidi, Perill. L. B. ab ASCH *) duos gradus distinxit, Ill. DOLST **) quatuor, Ill. ORAEVS ***) tres, cl. MINDERER †) quoque tres. Ill. vero SAMOILOWITSCH ††) graduum diuersitatem secundum durationis tempus distinxit, ita, vt initium morbi lenius, medium grauissimum et finem iterum leniorem esse referret.

§. III.

Simili quoque modo differunt celeberrimi scriptores in curatione huius morbi. Causam diuersitatis in epidemica constitutione, anni tempore, vitae ratione, temperamentorum discrimine rel. quaerendam esse, dubium vix est. †††) Ceterum vero descriptio, quam iidem dederunt, symptomatum pestis, tam accurate respondet ipsi huius morbi naturae et tam distincta et perfecta est, vt vel is, qui nunquam antea viderit pestem, errare nequeat, si hosce duces in obseruando morbo illo sequatur.

§. IV.

Graduum ipsorum adcurata distinctio, quae vbiuis conueniat, vix excogitari posse videtur: genus tamen pestis in acutam et lentem distribui, reliquasque diuersitates pro speciebus huius morbi

*) *Beschreibung der Heilart der Pest zur Zeit der ersten Ansteckung in Jassi, im Jahr 1770.*

**) *Diff. sistens obseruationes nonnullas de peste. Jenae 1784.*

***) *Descriptio pestis, quae anno 1770 in Jassia et anno 1771 in Moscu grassata est. Petrop. 1784.*

†) *Specimen inaugurale de peste eique medendi methodo. Jenae 1789.*

††) *Abhandlung über die Pest, welche im Jahr 1771 das Russische Reich, besonders die Hauptstadt Moscau verheerte. Leipz. 1785.*

†††) Probari hoc potest ex diuersitate curationum, quae breuiter expositae sunt in libro b. HOWARD pag. 96 — 100.



morbi haberi posse, equidem mihi persuadeo. Sed et hic occurrunt variae res accidentales, quae systematicae distributioni obstant. Praecipue enim ratio habenda est maioris minorisue vis et vehementiae ipsius contagii, nec non habitus et naturae aegroti. Ita quoque perinde non est, quo tempore medici auxilium quaerat aeger: morbus enim ab initio talis non est, qualis in decursu obseruari solet.

§. V.

Dubitari fere nequit, quin pestis miasma in Africa, et quidem in Aethiopia et Aegypto, oriatur et cum mercibus vehatur in Orientem, indeque in regiones ad mare nigrum sitas, immo etiam in Europam deferatur, vel mercaturae vel belli ope, ita tamen, ut semper immediato contactu ad propagandam et communicandam pestem opus sit. Patet hoc, ut vnico tantum exemplo utar, ex illa peste *), quae anno 1720 Massiliae incepit totamque fere Prouinciam Galliae deuastauit, quam navis ex Oriente illuc aduexit. Liceat quoque hoc loco exponere ea, quae a duobus viris fide dignissimis, nempe Perill. Lib. Bar. a FRIEDERICHs, qui Petropoli adhuc viuit, et b. Lib. Bar. a MÜLLER, qui in proelio contra Turcas cecidit, mihi communicata sunt. Hi, cum ex vrbe Chersonensi iter facerent Alexandriam et Cairum, ab incolis perceperunt, pestem plerumque oriri post eluuiionem Nili et subitanam terrae madidae desiccationem, inprimis si fame praegressa, ut saepe fieri soleat, vires corporis fractae et humores deprauati fuerint, adeoque maior ad pestem recipiendam procliuitas exorta fuerit: morbum quoque hunc, accedentibus illis malis, multo acerbiorum fieri subitoque homines necare. Conueniunt haec cum iis, quae THUCYDIDES de peste Atheniensi et LUCIANVS de illa, quae Romae obseruata fuit, literis tradiderunt.

§. VI.

Monuit quidem cl. HOLLANDE**), Aegyptum tanquam fontem pestis considerandam non esse, quia decem annorum spatio, quo

A 2

tem-

*) CHICOYNEAV von der Pest, übers. von RINGEBROIG. Leipz. 1783.

RUSSELL'S Treatise of the Plague. Lond. 1791. pag. 210.

**) SAMOILOWITSCH l. c. pag. 95.



tēpore nimirum Cairi vixit, morbus ille ibidem non adfuit, cum tamen eodem tempore Constantinopoli aliisque in locis omnino obseruatus fuerit. Hoc vero nostrae sententiae in iterata experientia fundatae non obstat: fortassis enim nihilominus pestis ortum traxit ex Aethiopia et Aegypto et transit Constantinopolim aliasque in regiones mercium ope, ibidemque per aliquod tempus abscondita et quasi suppressa fuit, donec noua incrementa capere potuerit. Sic GVIDO DE CHAVLIAC alique *) pestem, quae seculo XIV. in Gallia obseruata est, ex Aethiopia et Aegypto ortum duxisse certissimis argumentis probarunt.

§. VII.

Quam facilis sit miasmatis pestilentialis communicatio et quam diu illud latere possit, pluribus exemplis constat. Legimus apud b. HOWARD **), per solum floris infecti odorem communicatam fuisse pestem. Memorabilem historiam refert ORAEVS ***) vestimentorum, quae septem annorum spatio in cista asseruata fuerunt, tandemque, cum in lucem protraherentur, omnes, qui in illa domo erant, facta veneni communicatione, breui necarunt. Alios casus †), quibus constitit, viginti aut plures post annos pestis contagium vestimentorum aut aliarum rerum ope propagatum fuisse, silentio praetereo.

§. VIII.

Pestis, quae exorta iam est, vltior propagatio cautione rite adhibita euitari potest. Turcae vero, MVHAMMEDIS religioni addicti, nec in hoc morbo nec in aliis eiusmodi, cautionem adhibere solent, sed malum quodcunque suae forti committunt. Idem facere solent in peste, quae igitur diu remanere potest in vna eademque vrbe, ita tamen, vt, pro varia diuersarum causarum ratione, mox diminuatur, mox fere dispareat, mox denuo
nouis

*) Vid. *Dissertation de la contagion de la peste*. Toulouse, 1728.

**) l. c. pag. 82.

***) l. c. pag. 56.

†) CHICOYNEAV ex versione cl. RINGEBROIG Tom. I. pag. 199.



nouis quasi viribus captis sese prodat. Accidit Cherfoni, vbi tamen omnis diligentia et cura adhibita est, vt vespillones effoderent vestimenta eorum, quos pestis vis consumserat: haec per aliquod tempus occultata Iudaeis vendiderunt, adeoque morbum vix suppressum denuo excitarunt.

§. IX.

In morbis epidemicis vehementissimis, etiamsi in castris, nauibus, nosocomiis, carceribus aut in regionibus paludosis et humidis occurrant et singulari malignitate conspicui sint, signa illa characteristica pestis, nempe bubones et carbunculi, non obseruamus: si vero eiusmodi signa adparuerunt, casus illi ad rarissimos referendi sunt vel pro exceptionibus haberi debent. Fui ego in nosocomiis, in quibus tum a defectu sufficientis spatii, tum ab ingenti aegrotorum numero, tanta aëris deprauatio exorta est, vt minima quidem abscessuum leuiorum incisio propter aëris impuri accessum sphacelum mortemque inferret, et tamen vera pestis inde enata non est. Cum Russica classis in mari mediterraneo esset, calidissimae aestatis tempore, scorbuti vehementissimum gradum enatum esse vidi, qui tantus erat, vt in veram febrem putridam, eamque valde malignam, transiret: rarissime vero adparuerunt bubones, carbunculi nunquam, etsi bubones interdum ex metastasi orirentur. Nec vidi pestis indicia in Crimaea, vbi tamen aderant morbi biliosi et putridi maligni, aut in regione ciuitatis, cui nomen est *Dimitrei-Rostowsky*, ad ostium fluuii Tanais in paludem Maeotidem loco humido sitae, vbi ab incolis, qui piscatu solo viuunt, piscium intestina magnis aceruis collecta solis aestui vehementissimo exponuntur, quae tandem eum in modum foetidissimis hisce effluuiis aërem vitiant, vt pestiferum eum habeas, etsi vere pestilentialis non sit. In hac quoque regione morbos varios epidemicos, eosque periculosissimos et grauissimos, obseruaui, nunquam vero pestem. Ex his autem sequi videtur, pestem in Afrîca tantum generari posse a causis nondum satis cognitis: ibidem enim illam procreari, omnes fere obseruatores vno ore adfirmant.



§. X.

Natura ipsius contagii nondum satis liquet. Saepe quidem, sed non semper, febris putridae formam induit: plerumque enim, ut antea dictum iam est, epidemicae constitutioni annique tempori adcommodatur. Hinc explicare possumus, qui factum sit, ut plane diuersa curationis ratione in hoc morbo, felicissimo tamen successu, uterentur Medici, iique peritissimi: fuerunt enim, qui adhiberent venaesectionem et euacuantia, imo drastica purgantia, quae ego nunquam ausus sum dare; fuerunt alii, qui remedia antiseptica et sudorifera, vel sic dicta alexipharmaca, in usum vocarent.

§. XI.

Bilem vero, si pestis miasma non ab initio systema nervosum immediate adficit, infectione potissimum corripitur verosimile mihi videtur. Diuersa autem est ratio, si contagium, per immediatum contactum et inde enatam absorptionem in sanguinem delatum, elementares et constitutivas bilis partes putredine et acrimonia adfecerit, vel si per os intrauerit, et salivae admixtum in ventriculum et duodenum delatum fuerit, ibidemque bilem vitiauerit. Ipsa vero infectio per os, tum oriri potest ab halitu aegroti, si quis nempe propius sese ipsi admoueat, tum a sola inhalatione aëris per effluvia plurium aegrotorum peste laborantium corrupti et pestilentiali miasmate infecti *), inprimis si eiusmodi aegroti in loco angustiori continentur, nec vlla aëris depurandi et corrigendi ratio habetur.

§. XII.

*) The second mode of contagion is by the medium of the air. The effluvia arising from the diseased, received into the ambient air, form a pestiferous atmosphere, more or less impregnated with these effluvia, as it recedes from their source. That contagion is thus communicated in the chambers of the sick, appears from persons being infected without touching the diseased body, or any thing in the room that may be supposed to harbour infection. RYSSSELL's *Treatise* p. 298.



§. XII.

Humorum corporis humani nullus sane tantam acrimoniam induit, ac bilis; id quod variis in morbis biliosis probari potest. Nonne bilis per vomitum eiecta saepe tam acris est, ut palatum faucesque erodat ipsamque dentium aciem obtundat? Idem accidit interdum in peste, cum aegroti, vel sponte vel adhibitis emeticis, vomitu corripuntur. Quam maxime autem patitur bilis et acris redditur, si eius particulae elementares et constitutivae in ipso sanguine corrumpuntur miasmate tam subtili et volatili. Hinc facile enasci potest sanguinis orgasmus et versus caput congestio, cuius symptomata plerumque sunt capitis dolor, oculorum rubor, delirium, immo ipsa rabies etc. Saepe eiusmodi phaenomena in peste observata sunt, etiamsi nulla plethorae indicia adessent. Desumitur inde venaesectionis indicatio ad compescendum sanguinis impetum, ita tamen, ut summa cautione parva plerumque sanguinis copia e vena mittatur, idque potissimum fiat eum in finem, ut alia remedia idonea deinceps meliori cum successu adhiberi possint. Eiusmodi in casibus Ill. DOLST *) venaesectionem instituit, antiphlogisticis et ad aluum laxandam idoneis remediis usus est, quibus demum subiunxit spiritum MINDERERI et salia herbarum cum aceto vini aut succo citri mixta, quae sub ipso actu effervescentiae dedit. Ita quoque cl. RUSSELL **) sanguinem e vena mitti iussit, non vnica solum sed iterata vice, si opus esset.

§. XIII.

Remedia sudorifera, quae quibusdam in casibus pestis summo cum usu adhibita, immo vim quasi specificam habere visa sunt, quorum in numerum refero mixturam simplicem a variis Medicis in usum vocatam aliaque eius generis medicamenta, sudorem

*) Vid. ERVS Diff. supra allegata.

**) *Treatise of the plague* pag. 162. „Bleeding was recommended as early as possible, but seldom repeated, where a quantity deemed sufficient had been taken at first; except where particular circumstances rendered it clearly requisite.“



rem foetidum et viscidum mouendo omne miasma e corpore nonnunquam eiecerunt. Probatur inde, materiam biliosam corruptam ad superficiem corporis deferri adeoque impediri posse, quo minus haec ipsa materia nobiliores partes inuadat aut totam massam sanguinis putredine adficiat. Docuit experientia, singularem consensum intercedere cutem inter et organon secernens bilem, materiamque biliosam facile ad integumenta externa deferri: exemplo sit erysipelas biliosum post terrorem enatum, aut icterus iram vehementiorem insequens, vel inflammatio biliosa ex ambustione ortum ducens.

§. XIV.

Sudorem vero viscidum illum particulis biliosis corruptis onustum esse, docent varii morbi, qui ex polycholia oriuntur, ac potissimum sudore tenaci, oleoso et ad cutis superficiem vitionis sensum excitante, vel vrina turbida eundemque vitionis sensum, dum per vrethram emittitur, producente iudicantur. Saepe hoc et in peste euenit, in qua sputa quoque viscida haud raro obseruantur: haec vero manifeste biliosa sunt et in morbis a bile exortis frequenter occurrunt. Monendum autem est, diarrhoeam in peste raro locum habere, eamque, si qua accidit, non criticam et salutarem, sed symptomaticam plerumque et perniciosam esse.

§. XV.

Videtur quoque haec ipsa materia biliosa contagii ope subtilior facta, si in putredinem conuertitur, in causa esse, cur carbunculi et furunculi gangraenosi oriantur. Perraro fit, vt sola putredo eiusmodi tumores producat, nisi accedat materia quaedam acris et volatilis, quae ad partes adfectas deferatur. Venit mihi in mentem exemplum Subcenturionis cuiusdam, qui matutino tempore ad aerarium venit, vt pecuniam acciperet. Fuerunt ipsi in facie pustulae aliquae rubrae pruritum excitantes; ceterum vero sanus fuit nullumque molestiae sensum percepit. Duarum autem horarum spatio pustulae sese eleuarunt et carbunculos conspi-



conspicuae magnitudinis formarunt. Tum sensit dolorem capitis, vertiginem viriumque defectum. In domum mox delatus, eodem die vespertino tempore e vita discessit.

Eadem haec biliosa materia fortassis in causa est, cur non in omnibus casibus acida mineralia aut vegetabilia pari successu adhibeantur, id quod non ex aliorum observatione solummodo percepi, sed et ipse expertus sum.

§. XVI.

Venio iam ad alteram infectionem, quam per os fieri supra monui. Hanc quidem nonnulli plane negarunt, sed perperam, quippe quam saepe locum habere ipsa experientia testatur. Omnium morbi symptomatum et signorum examine adcurate instituto facile mihi interdum fuit distinguere, num absorptionis ope per cutem, vel num per receptionem in primas vias infectio locum habuerit. In hoc autem me non errasse, ipse curationis, singulari pestis origini adcommodatae, felix successus patefecit.

§. XVII.

Qui hoc altero infectionis genere correpti fuerant aegroti, sequentibus laborare solebant incommodis. Erant ipsis oculi languidi, lingua viscoso mucō obducta, sapor in ore amarus, pressio sensus in praecordiis, dolor in regione lumborum et ossis sacri, lassitudo, virium defectus, tristitia et animi demissio. Hisce in casibus egregius plerumque fuit emeticorum usus, pro re nata iteratus, cuius ope magna corruptae bilis copia eiecta est, quo facto non ea solummodo symptomata, quorum supra mentionem feci, disparuerunt, sed etiam respirationis difficultas, a contagio in pulmones delato procul dubio enata, mox remota est. Denique eam bilis partem, quam in sanguinem iam transiisse mihi persuasi, remediis sudoriferis, quae sudores viscidos, atque oleosos mouerunt, expellere studui, id quod optime mihi successit. Interdum vero salia media resoluentia leniterque laxantia adhibui, praesertim cum bilem mucō mixtam et quasi inuolutam esse animaduverterem. Ex illa vero mucī abun-

B

dantia



dantia lenta pestis, cuius supra mentionem feci, ortum duxisse videtur. Haec quidem morbum diutius protraxit, et saepissime exitialis fuit.

§. XVIII.

Egregius autem plerumque fuit usus, quem ad curata distinctio diuersi infectionis generis variique ipsius contagii in bilem effectus mihi praestitit in curatione aegrotorum, dum nempe ab initio morbi accederem. Si vero vnus alterue dies, aut plures, praeterlapse fuerant, tanta iam, pro varia ipsius contagii vehementia, enata erat massae sanguineae deprauatio, vt raro auxilium superesset, nisi naturae vires singulari et insolita prorsus ratione subuenirent.

§. XIX.

Emeticorum usus in primo quoque infectionis genere salutaris fuit, quorum nempe vi non solum sordes in ventriculo obuiaie eiectae sunt, sed etiam materia morbi ad cutem delata est, id quod mechanicae corporis concussioni et neruorum stimulo tribuendum esse videtur. Datis vero tali euentu remediis istis, si deinde adhiberentur diaphoretica, e. gr. mixtura simplex, liquor mineralis anodynus HOFFMANNI cum camphora, spiritus MINDERERI, flores sambuci et quae sunt eius generis alia; sudores exorti sunt salutare, quorum ope morbus saepe sublatus est.

§. XX.

Remedia antiseptica, v. c. cortex peruianus, serpentaria virginiana etc. in hoc morbi genere non solum frustra adhibita sunt, sed manifeste damnum intulerunt, etsi in putrida peste, iusto tempore data, egregie plerumque conducerent. Inter ista vero remedia principem locum interdum obtinuit decoctum arnicae concentratum acido vitriolico mixtum, alio vero tempore maiorem usum praestare visum est decoctum corticis peruiani cum elixirio vitrioli MYNSICHTI, aut spiritus vitrioli potui ordinario admixtus, praesertim si aderant petechiae aut sanguinis echymoses



chymoses aliaque dissoluti sanguinis indicia. Tum quoque ex usu fomentationum tepidarum aceti, aut ex frictione extremitatum spongiae aceto madefactae ope, optimum successum euenisse vidi.

§. XXI.

Superfluum sane foret, si varia pestis signa et symptomata prolixè enarrare vellem, quippe quae in scriptis supra allegatis adcurate copioseque exposita sunt. Accedit, quod varietates, quae in peste occurrunt, a variis causis accidentalibus dependeant, adeo, ut necesse sit, cuiusvis pestis genium quasi explorare, morbiue naturam non solum sollerti studio indagare, sed etiam cum aliis eodem loco iam antea observatis pestis speciebus comparare. Quod si equidem in curando atrocissimo hoc morbo non infaustus fuerim, sollerti cautoque naturae studio hoc tribuendum esse lubens fateor.

§. XXII.

Liceat autem de signis characteristicis pestis, nimirum de carbunculis et bubonibus quaedam proferre. *) In eo potissimum res versari videtur, ut rite distinguas, num breui post infectionem, vel num die quarto, aut quinto, aut serius adhuc adparuerint? num symptomatice vel metastatice aduenerint? Si symptomatici sunt hi ipsi tumores, tuto per discussionem aut resolutionem auferri possunt: si vero critici aut metastatici sunt, non repelli debent a superficie corporis sed ad supurationem excitandi sunt, eum in finem, ut materia morbi, quae corpori inest, ad superficiem deferatur. Hoc vero fit pro re nata, vel cataplasmatum emollientium, vel irritantium adplicatione, aut iusto vtrorumque connubio. Carbunculi, qui metastatici sunt, incisionibus tempestive aperiri possunt, ita tamen, ut loci ipsius, partium vicinarum etc. ratio habeatur. Matura

B 2

ho-

*) Varias observatorum de pathognomonicis et characteristicis pestis signis si legere vis, HOWARDI librum adeas, quippe qui pag. 91 --- 94 illas exposuit. Monendum vero est, ipsam regulam non tolli exceptionibus.



horum tumorum incisio necessaria est, tum ut impedias, quo minus materia acris serpat illaesaeque partes inuadat, tum ut idonea remedia ad fundum usque tumorum deferre putredinemque corrigere et sphacelum compescere possis. Hac quoque ex causa incisiones satis profundae esse debent. Euacuato ichore acri et putrido, suppuratio bona idoneis remediis procreanda est.

§. XXIII.

Cataplasmata, quae hisce in casibus potissimum adhiberi solebant, e floribus chamomillae et arnicae composita, et aceto, sale ammoniaco farinaque mixta erant. In usum quoque vocatum est fermentum panis cum aceto, sinapi et melle. Simulac adparuerunt suppurationis incipientis signa, vnguentum digestivum et basilicum cum salis ammoniaci aliqua parte mixtum applicatum est. Hisce vnguentis superimposita sunt cataplasmata emollientia, donec suppuratio sufficiens oriretur et corruptarum sphaceloque destructarum partium separatio fieret. Interdum sufficiens fuit usus vnguenti basilici et cataplasmatum emollientium.

§. XXIV.

Bubonibus adplicui cataplasmata ex aqua vegeto-minerali et mica panis parata, quibus per noctem substitui emplastrum de galbano-crocatum aut diachylon compositum. Memini me videre egregium horum remediorum effectum variis in casibus, praesertim in morbo, quo correptus fuerat iunior quidam Chirurgus meae curae traditus. Si vires naturae languent, remedia magis stimulantia et irritantia addenda sunt, v. c. gummi ammoniacum, galbanum, sapo venetus etc. quae cataplasmatibus rite admiscentur. Quamprimum in bubonibus fluctuationem sentias, aperire illum debes, quo facto suppuratio per aliquod tempus sustentanda est, donec vulneris inflicti sanatio sponte locum habeat. Haec vero secundum generaliores regulas tractanda sunt. Quod denique ad symptomaticos carbunculos attinet,

net, discussio illorum peracta est fomentationibus tepidis ex aceto paratis, quibus vel camphora vel sal ammoniacus addebatur.

§. XXV.

Carbunculos in ipsis bubonibus oriri posse, id quod nonnulli negarunt, observatio docuit Ill. ORRAEI, quam et equidem exemplo confirmatam vidi. Nauticus quidam in nosocomium, quod curae meae demandatum erat, delatus est. Id quidem non destinatum erat aegrotis peste laborantibus, tamen vero quotidie fere accidit, ut decem ad viginti usque inuenirentur, quos a reliquis separare necesse erat, quia carbunculis aut bubonibus iam laborabant. Inter hos erat ille, de quo sermo est. Oculi languidi, lingua mucro viscido obducta, animus demissus, virium defectus, et infirmitas extremitatum inferiorum, quae tanta erat, ut titubando ebriorum instar incederet, suspicionem mouerunt, hominem istum pestis contagio correptum esse, quo nempe morbo nervosum systema potissimum adficitur. Instituto accuratiori examine, bubonem inueni in glandula thyreoidea *) et maxillarem glandulam tumidam animaduerti. In medio bubonis vidi pustulam, quae octo horarum spatio in carbunculum conspicuae magnitudinis mutata est. Ad excitandas vires vitales dedi ipsi liquorem anodynum mineralem HOFFMANNI cum camphora, vna cum potu calido ex infuso florum arnicae et sambuci parato. Iussi carbunculo adplicari cataplasmata antiseptica ex floribus chamomillae et arnicae, farina et aceto composita: erat enim tumor iste symptomaticus, non criticus. Mox tamen exorta est gangraena in carbunculo et in ipso bubone. Insequenti die inueni carbunculum, pariter ac bubonem, sphacelo correptum, nigrum et ichore foetidissimo inquinatum, totamque cutem anterioris partis colli putredine adfectam et destructam. Breui post incredibili celeritate totum fere collum sphacelo correptum est, et mox in soporem incidit aegrotus nocteque insequenti e vita discessit. Adhibui remedia antiseptica efficacissima, e. gr. camphoram, moschum, corticem peruianum etc. sed sphacelum tollere non potui.

B 3

§. XXVI.

*) Vnico hoc exemplo bubones in hac glandula vidi, etsi magnum aegrotorum peste laborantium numerum observauerim.



§. XXVI.

Diaeta ad certas ac definitas regulas adcommodari nequit, quippe quae pro consuetudine et habitu aegroti ac pro diuersa morbi indole variare debet. In genere tamen, eiectis prius biliosis sordibus ex ventriculo, melius conducit diaeta animalis acidula, e. gr. iusculum carnum aceto aut succo citri mixtum, quam mere vegetabilis, quia vires naturae vitales, quantum fieri potest, sustentari debent. Ipsa caro tenera aceto humectata bono cum successu aegrotis data est, si nempe non aderant manifesta putredinis signa. Inter vegetabilia vero fructus acidos maturos dedi, inprimis baccas Vaccinii oxycocci LINN.

§. XXVII.

Quod ad prophylaxin in peste obseruandam attinet, non habeo quidem quae addam iis praeceptis, in quibus exponendis versati sunt scriptores supra laudati: pauca tamen ex mea qualicumque experientia desumta breuiter indicare liceat. Verum omnino est, infectionis periculum plane auerti posse, tum fuga aegrotorum, tum euitatione immediati contactus. Sed quis est medicorum, qui miseros suae sorti committere se sine scelere posse existimet, ut sibi salutique propriae tantummodo prospiciat? Procedamus igitur ad aliud auxilii genus! Opus est, ut animo sit intrepidus quicumque ad homines peste infectos adpropinquare velit debeatque, ut ieiunus non sit, ut acetum vini odoretur aut fumum tabaci capiat, ut immediate post contactum manus lauet aceto vini. Deinde quoque vestimenta mutanda, et ea, quae deposita fuerint, aëri libero exponenda et fumiganda sunt, aut induenda est vestis e panno cerato confecta. Conducit quoque, si vespertino tempore capias potum calidum e spiritu oryzae, saccharo, succo citri et aqua compositum, qualem Angli *punch* vocant, quippe qui transpirationem mouet. Si vero credas, te infectione correptum esse, emeticum statim capias, dein verò sumas mixturam simplicem cum infuso florum arnicae et sambuci, et in lectum te recipias, ut sudor oriatur, cuius ope potissimum miasma illud subtilissimum expelli potest, si nempe humo-

humoribus intime nondum admixtum est. Hisce remediis ego-
met saluti meae prospexi.


§. XXVIII.

Sunt, qui contendunt, nullam praedispositionem locum habere, sed quemcunque sine omni exceptione per solum contactum contagio adfici; sunt alii, qui contrarium doceant, a quorum parte et me stare fateor. Refert Ill. ORRAEVUS *), se vidisse parabolanos, qui in vno eodemque lecto cum aegrotis peste laborantibus decumberent, aut lecto impune vterentur, in quo breui antea alii mortui erant. **) Per decem fere menses quotidie visitaui plures aegrotos peste laborantes, pulsum examinaui digitis, manusque saepe admoui tum corpori tum vestimentis illorum qui hoc morbo adfecti erant, et tamen ne minimum quidem contagii vestigium in me percepi. Nullam aliam adhibui cautionem, nisi illam, de qua supra dixi. Mane potum coffeae sumsi, in nosocomio tabaci fumum hausi, dein corpus modice moui in aëre libero, donec oriretur aliqua transpiratio, et vesperi vno alteroue cyatho potus illius anglici, qui *punch* vocatur, vsus sum. Alii, qui raro accedebant ad aegrotos peste laborantes eosque vix digitorum apice tetigerant, omni cautione adhibita tamen infectione correpti et necati sunt. Nonne ex his exemplis satis patet, adesse debere dispositionem aut procliuuitatem quandam ad recipiendum miasma pestilentielle?

§. XXIX.

*) I. c. pag. 81.

**) The houses which before were full of the dead, were now again inhabited by the living, and the shops which had been most part of the year shut up, were again opened, and the people again chearfully went about their wonted affairs of trade and employ, and even, what is almost beyond belief, those citizens who were before afraid even of their friends and relations, would, without fear, venture into the houses and rooms where infected persons had a little before breathed their last: nay, such comforts did inspire the languishing people, and such confidence, that many went into the beds where persons had died, even before they were cold or cleansed from the stench of the disease. RYSELL, pag. 270.



§. XXIX.

A pestis inoculatione vix credo boni aliquid sperari posse: vera enim ea esse, quae Ill. ORRAEVS *) et DOLST **) monuerunt; experientia edoctus sum. Pestem plus vna vice eidem homini posse communicari, docuit nuperrime quoque cl. RUSSELL ***), id quod et ego expertus sum. Vnicum liceat exemplum adducere ex pluribus, quae exponere possem, si in re tam evidenti multarum observationum fide opus esset. Summi praefectus classis iussu factum est, vt conspicuum numerum eorum hominum, qui in magno nosocomio curandis peste laborantibus destinato fuerant et a morbo conualuerant, debita prius cautione adhibita examinarem. Iussum erat a praefecto, vt in libero aëre, depositis vestimentis omnibus aequae ac indusiis, in tota corporis superficie aceto vini lauarentur, quo facto data ipsis sunt sumtibus Augustissimae Imperatricis noua plane vestimenta, tandemque reducti sunt ad alia domicilia satis spatiosa. Tum trium vel quatuor hebdomadum spatio saepe examinati et obseruati sunt, donec, nullis amplius morbi indiciis adparentibus, ad solita militum tuguria mitterentur. Horum hominum nonnulli post duos tresue menses, etsi nulla prorsus morbi indicia apud illos adparuerant, denuo peste infecti sunt. Itaque cum et hoc exemplo satis pateat, vnum eundemque hominem duabus aut pluribus vicibus peste adfici posse, non video, quemnam usum praestare possit pestis insitio. Nec spero fore qui credant, in hoc meo exemplo aliquas contagii reliquias remansisse

*) l. c. pag. 61.

**) Diff. supra allegata pag. 30.

***) In the plague, contrary tho what happens in the small-pox, persons are liable to be infected more than once; not only at long intervals, and in different climates, but in the same town, in the course of the same pestilential season. This fact, which has been doubted formerly by some physicians, and by others expressly contradicted, has been long established upon the best authorities. RUSSELL pag. 180.

mansisse et miasma per tam longum tempus absconditum latuisse, id quod omni sane experientiae contrarium est. *)

§. XXX.

Saeplissime obseruauī id, quod Ill. ORRAEVUS **) iam monuit, pestis nempe contagium per calorem artificialem longe volatilius et subtilius quasi reddi. Balnea illa calida et sudorifera, quibus frequenter uti solent Russi, infectionem quam maxime faciilitant. Saepe vidi homines peste infectos, qui praeterito die in balneo fuerant, quam ob rem curauī, ut balnea illa maiori minoriue poena sancirentur. Idem infectionis genus obseruauī, cum lotrices indusia et vestimenta aegrotorum lauarent. Contagium enim hisce vestimentis adhaerens vapore aquae calidae soluitur, et cum illo vel per cutem absorbetur, vel per os et nares in pulmones et primas vias transit.

§. XXXI.

Cum pestis plane disparuerat, febres exortae sunt, iis nimirum in locis, vbi contagium sporadice tantummodo obseruatum fuerat. Hae febres secundum meas aliorumque obseruationes maligniores fere erant, quam ipsa pestis, multisque hominibus exitiales, praesertim si non statim ab initio remediis idoneis coercerentur. Praeter petechias vero diuersae magnitudinis, nec carbunculos nec bubones in illis animaduerti.

§. XXXII.

Atrocissima haec epidemia inter fabros nauales potissimum
 obseruata est. Hi, pariter ac reliqui Chersoni incolae, pestis

*) In what time after its reception, the pestilential virus begins to discover itself, is a point of difficult discussion. The period, from unknown causes, varies in different subjects; but its effects, in some instances, seem to be almost instantaneous: or, at least, become perceptible in a few hours. I venture to assert this from the having known persons who had long been shut up, taken ill almost immediately, or in a day or two, after their coming out from confinement. M. Bertrand places the extreme term at thirty-five days, beyond which no instance was observed at Marseilles. RUSSELL pag. 195.

*) l. c. pag. 58.



contagio antea fuerant correpti, quod ut euitarent ad tuguria confugerunt, in iisque ob angustiam loci confertim degerunt, quo facto alter alteri detrimento fuit. Omnem quidem curam adhibuerunt praefecti nauium *), ut aegroti a reliquis separati in loco satis ab vrbe remoto, nempe in nosocomio, quod meae curae demandatum erat, omnibus rebus abunde instruerentur, quaecunque ad salutem ipsorum seruandam et restituendam necessaria essent; tamen vero ab initio huius epidemiae tanta fuit morbi vehementia et insuperabilis atrocitas, ut non solum ille chirurgus, cui aegrotorum examen demandatum erat, vna cum vxore sua mox periret, sed etiam, ut maxima aegrotorum pars huic malo succumberet. Ab octodecim aegrotis, quos prima die versus meridiem in nosocomium recepi, altera die matutino tempore quinque tantummodo supererant: insequenti tempore morientium numerus decreuit quidem, sed tamen conspicuus fuit. Tanta erat humorum putredo, ut breui post mortem ex ore aliisque partibus, immo e tota corporis superficie, sanguis copiose erumperet.

§. XXXIII.

Statim ab initio morbi aderat summa virium prostratio, singularis animi demissio, pulsus parvus et adeo exilis, ut digitis vix percipi posset, et sopor, qui praecipue morbi vehementiam indicabat. Die tertio vel quarto accedebant petechiae insolitae magnitudinis in toto fere corpore, vel vibices in quibusdam partibus, praecipue in extremitatibus et in dorso. In nonnullis exorta est narium haemorrhagia, quae leuamen non attulit, sed vires manifeste fregit.

§. XXXIV.

In principio morbi efficacissima remedia antiseptica adhibenda erant. Corticem peruuanum, arnicam, acida mineralia, campho-

*) Non possum, quin laudibus extollam singularem egregiorum horum virorum humanitatem et erga omnes benignitatem, quam et ipse expertus sum. Inprimis grata mente recordor insignem erga me beneuolentiam Illustrissimorum Virorum, Comitis a BALMEN et Equitis SVCHOTIN, quorum ille militum, hic nauium summus praefectus fuit. Optimis hisce Patronis et me vitam ac salutem debere lubens fateor.

camphoram, serpentariam virginianam largis dosibus praescripsi: potum ordinarium, quem spiritus vitrioli ope acidum reddideram, frigidum dedi. Cubicula, in quibus detinebantur aegroti, libero per fenestras apertas aëris introitu depurare studui, etsi hoc fieret mense Ianuarii. Saepissime quovis die aceti feruidi vapore cubicula impleui, atque lectos et pauimenta aceto humectari iussi. Aegrotorum, quos in nosocomium recepi, totum corpus spongiae aceto madefactae ope mox lauari curavi; quo facto, datis prius mundis vestimentis, mundis cubilibus illos collocari iussi.

§. XXXV.

Remedia euacuantia raro adhibenda erant, exceptis tamen emeticis, quae in usum vocare non dubitavi, si signa fordium manifesta vel spontanea vomendi conamina aderant. Immediate post emeticorum usum antiseptica usus sum methodo. In iis casibus, in quibus mihi contigit esse tam felici, ut vires vitales plane fere prostratas excitarem et augerem, cui vsui inprimis largae doses camphorae inferuire animaduerti; aegroti quidem breui conualuerunt, sed minus perfecte. Raro enim crisis manifesta, euacuatoria vel alia, adparuit, vrina tamen excepta, in qua sedimentum fuscum et foetidum aliquoties obseruavi. Diarrhoea si qua accedebat, colliquatiua erat, pariter ac sudores, qui, cum etiam colliquatiui essent, aegrotos ita debilitarunt, ut breui post, amissis omnibus viribus, e vita decederent.

§. XXXVI.

Soporis aut stuporis speciem in plerisque per aliquod tempus remanere animaduerti, cui equidem optimo cum successu opposui continuatum acidorum usum. Hunc in finem inprimis dari iussi potus acidulos et iuscula aceto vini mixta.

§. XXXVII.

Periculosissima haec epidemia manifeste diminuta est, tandemque sex circiter hebdomadam tempore elapso plane cessauit, sequenti auxilio adhibito. Qui nempe sani erant, e domiciliis suis in tentoria, in libero campo exstructa, delati sunt, noua-



que vestimenta acceperunt, ipsisque domibus plane destructis utensilia omnia incendio deleta sunt. Aegroti in nosocomia missi a se inuicem separati sunt. Noua ipsis quoque data sunt vestimenta, et illa, quibus prius vsi fuerant, idoneis suffimentis fumigata libero aëri diu exposita sunt. Ita factum est, vt praeter hosce homines nemo corripere hac epidemia, reliquaque plebis pars, euitato cum illis commercio, ex hoc periculo euasit.

§. XXXVIII.

Omnes quidem subchirurgi, pariter ac ministri et parabola-
ni, hoc morbo correpti, sed tempestiuo remediorum antiseptico-
rum vsu restituti sunt: ipse vero equidem et hoc contagio adiectus
non fui. Nonne ex hoc quoque exemplo sequitur, opus esse disposi-
tione quadam in corpore, si infectio locum habere debet?

§. XXXIX.

Ineunte aestate anni 1784 pestis Chersoni cessauit. *) Ad
quasdam regiones Ukrainiae delata quidem est, praecipue ad vr-
bem *Krementschuk*, sed vltior eius propagatio impedita est sin-
gulari studio eorum, qui publicis rebus praefecti erant, quorum
cura id, quod in hac parte opus erat, prouisum est. Dubium
non est, fore, vt in posterum libera semper sit et maneat caris-
sima patria ab atrocissimo hoc malo: AVGVSTISSIMAE enim
IMPERATRICIS, cuius humanitatem et in subditos suos,
quotquot eorum sint, benignitatem omnes vno ore profitentur ac
venerantur, iussu tam egregia praecepta tradita et vulgata sunt,
vt sancta et adcurata eorum obseruatione malum illud omnino
auerti in posterum debeat ac possit.

*) „Iunio mense, qualiscunque et quantacunque sit ibi (Cairi) pesti-
lencia, sole primam cancri partem ingrediente, omnino tollitur,
quod multis plane diuinum esse non immerito videtur. Sed quod
etiam valde mirabile creditur, omnia supellectilia pestifero conta-
gio infecta tunc nullum contagii effectum in eam gentem edunt,
ita, vt tunc ea vrbs in tutissimum ac tranquilissimum statum redu-
catur ex summe morbofo, atqui morbi particulares sporadici tunc
apparere incipiunt, qui nusquam gentium tempore pestis adpare-
bant.“ PROSPER ALPINVS *de med. Aegypt.* L. I. cap. 17.

